

Plenarni sastanak Strukturiranog dijaloga između Evropske unije i Bosne i Hercegovine
o pravosuđu i dodatnim pitanjima o vladavini prava
Sarajevo (Bosna i Hercegovina), 13-14. maja 2014.

Preporuke Evropske komisije

Po pitanju dnevnog reda Strukturiranog dijaloga, Evropska komisija:

Imajući u vidu najnovije zaključke o Bosni i Hercegovini, koje je Vijeće za vanjske poslove usvojilo u Luksemburgu 14. aprila 2014, o podršci proširenom programu EU i angažmanu u pogledu BiH, uključujući i proširenje Strukturiranog dijaloga o pravosuđu na druga pitanja vladavine prava,

- ponovo ukazuje na značaj proširenog dnevnog reda Strukturiranog dijaloga, koji uključuje nove prioritete zajednički utvrđene sa predstavnicima nadležnih domaćih vlasti i civilnog društva, u sljedećim oblastima politike: borba protiv korupcije, borba protiv diskriminacije, sprečavanje sukoba interesa, mjere za jačanje integriteta, odgovornosti u radu i efikasnosti policije u okviru postojećeg zakonskog okvira;
- naglašava da su posebno antikorupcijske politike prioritet koji nalaže multidisciplinarni i holistički pristup i procjenu uz primjenu svih relevantnih instrumenata i platformi, uključujući i Pakt za rast;
- ponavlja da će se svi prioriteti relevantni za mapu puta liberalizacije viznog režima i dalje pomno pratiti putem mehanizma za praćenje nakon provedbe procesa liberalizacije viznog režima. U tom smislu, Evropska komisija će i dalje predano periodično procjenjivati dosljednost napretka i održivost svih reformi koje su poduzete prema kriterijima mape puta za liberalizaciju viznog režima;
- ponavlja svoju opredijeljenost za reformu pravosuđa i procesuiranje ratnih zločina kao glavnih prioriteta Strukturiranog dijaloga i ključnih pitanja koja će se rješavati sve dok domaće vlasti ne budu garantirale održive reforme u korist konsolidacije istinski nezavisnog, vjerodostojnog, djelotvornog, efikasnog, nepristrasnog i odgovornog pravosuđa. Ova pitanja su kamen temeljac vladavine prava u cijeloj Bosni i Hercegovini;

- podsjeća da će se ovaj proces razvijati potpuno u skladu sa relevantnim *acquisom* i evropskim standardima vodeći računa o preporukama Evropske komisije i stavovima Evropske komisije za demokratiju putem prava (Venecijanske komisije) u Vijeću Evrope.

Po pitanju profesionalizma u pravosuđu, Evropska komisija:

- pozdravlja uvođenje novog sistema konkursa u vidu pismenog ispita za sve kandidate za pravosudne funkcije i sistematizaciju strukturiranih intervjua za sve kandidate, uključujući i interna napredovanja, s ciljem veće objektivnosti i transparentnosti u zapošljavanju na osnovu zasluga i kvalifikacija;
- očekuje od svih sudija i tužilaca da se u potpunosti pridržavaju pravilnika o radu, uključujući i provedbu sistema normi koji je uveden u proteklih nekoliko godina;
- istovremeno pozdravlja napore da se unaprijedi ocjenjivanje rada sudija i tužilaca kroz prilagodbe normi za radnje u predmetima koji zahtijevaju više pažnje zbog svoje složenosti i prioriteta, čime se postiže usklađenost godišnjih revizija kvantitativnih ciljeva sa kvalitativnim karakteristikama koja je neophodna za pravično ocjenjivanje;
- ponovo naglašava važnost djelotvornog i efikasnog disciplinskog postupka i sankcija u slučaju kršenja profesionalnih dužnosti nosilaca pravosudnih funkcija kroz bolje institucionalno pozicioniranje i veće ovlasti disciplinskog tužioca;
- ohrabruje VSTV da usvoji Pravilnik o sukobu interesa svojih članova kao početni korak ka napretku u ovoj oblasti;
- podstiče usvajanje jasnih pravila i propisa za rješavanje sukoba interesa u okviru širih sudskih i tužilačkih usluga u cijeloj zemlji, uključujući i funkcionalni sistem za podnošenje i praćenje imovinskog kartona sudija i tužilaca.

Po pitanju nezavisnosti pravosuđa i institucionalne reforme pravosudnih organa na državnom nivou, Evropska komisija:

- ponovo naglašava zaključke sa stručnog seminara iz decembra 2012, koji je održan uz podršku TAIEX-a, u prisustvu relevantnih stručnjaka iz Venecijanske komisije;
- konkretno podsjeća na zaključak da bi „svaka strukturna reforma kojom bi se ponovo uspostavila snažna uloga ostalih grana vlasti, odnosno izvršne i zakonodavne, u vezi sa prerogativima pravosuđa, značila vraćanje unazad, a pogotovo ako ne postoje posebne

zaštitne mjere koje bi spriječile da političke stranke u velikoj mjeri utiču na postupak imenovanja“;

- naglašava da ova procjena ima smisla u odnosu na pravila kojima se uređuju kako postupak imenovanja osoblja zaposlenog u pravosuđu od strane VSTV-a tako i postupak imenovanja samih članova VSTV-a;
- podsjeća kako je potrebno spriječiti prevelik uticaj političkih stranaka na postupak imenovanja i očekuje od Ministarstva pravde BiH da pažljivo analizira preporuke Venecijanske komisije usvojene na 98. plenarnoj sjednici održanoj 21. marta 2014. i pretoči ih u konkretne izmjene i dopune nacrtu zakona o VSTV-u, naročito imajući u vidu preporuke koje se tiču postupaka imenovanja/razrješenja članova VSTV-a, imenovanja tužilaca i sastava, te sastava i strukture Vijeća;
- u tom smislu, podsjeća da reforma VSTV-a mora biti predmet temeljite unutrašnje rasprave prilikom koje će se uzeti u obzir nalazi i zaključci iz Mišljenja Venecijanske komisije o nacrtu zakona o VSTV-u. Rezultat reforme mora odražavati najveći mogući konsenzus, koji će doprinijeti konsolidaciji funkcija jedinstvenog VSTV-a u cijeloj državi, u skladu sa Ustavom BiH, i daljem jačanju njegove uloge u uspostavi vladavine prava u cijeloj BiH;
- na temelju ovih principa, poziva Ministarstvo pravde BiH da revidira nacrt zakona o VSTV-u i dostavi ga Vijeću ministara na razmatranje i dalju zakonodavnu proceduru;
- u skladu sa čl. 17. (28) važećeg Zakona o VSTV-u, te na osnovu postojećih podataka, zadužuje VSTV da, u saradnji sa Sudom BiH i drugim nadležnim sudskim instancama, dostavi analitičko mišljenje o primjeni proširene krivične nadležnosti pravosudnih organa na državnom nivou;
- ovo mišljenje treba biti završeno najkasnije do kraja juna 2014. i treba da sadrži:
 - 1) broj predmeta u kojima je primijenjen čl. 7.2 Zakona o Sudu BiH od uvođenja reforme iz 2003. do danas;
 - 2) posebno naznačene vrste krivičnih djela u nadležnost Entiteta/BD koje su procesuirane pred Sudom BiH;
 - 3) sažetak glavnih argumenata koje su dostavili pravosudni organi na državnom nivou prilikom pozivanja na proširenu nadležnost kao i informacije o toku postupaka;
 - 4) statistički pregled konačnih ishoda postupaka i sve ostale detalje koji su relevantni za analizu ove sudske prakse.

- naglašava da će predlagač zakona uzeti u obzir podatke koje je dostavio Sud BiH i nalaze analitičkog mišljenja. Kada se usvoji analitičko mišljenje, obavezuje se da će pružiti dodatnu tehničku pomoć EU za izradu nacrt zakona;
- podsjeća da za vrijeme priprema nacrt Zakona o sudovima BiH za zakonodavni postupak, Ministarstvo pravde BiH treba osigurati najširu političku podršku ovom zakonskom prijedlogu na temelju koncensusa, u skladu s najnovijim komentarima Venecijanske komisije od 11. februara 2014, na nacrt člana 15. (krivična nadležnost) i druga pitanja od značaja;
- konkretno, naglašava pitanja koja je pokrenula Venecijanska komisija o novom nacrtu člana 15. (2) (b), koji nalaže eventualne prilagodbe, ali i dodatni poseban stav o krivičnim djelima koja počinje pojedinci;
- nadalje podsjeća na ranije izražene stavove da načelo proširene nadležnosti pravosudnih organa na državnom nivou treba zadržati tako što će relevantni parametri biti objektivni kako se ne bi dovelo u pitanje načelo "prirodnog sudije".

Po pitanju učinkovitosti pravosuđa, Evropska komisija:

- podsjeća da smanjenje općeg zaostatka u rješavanju predmeta u sudovima i tužilaštvima ostaje ključni prioritet. Pored postojećih planova za smanjenje zaostatka u rješavanju predmeta, poziva VSTV da traži dalja systemska rješenja u cilju rasterećenja sudova širom BiH od nagomilanih predmeta, uključujući uvođenje zakonskih inicijativa, naročito u pogledu neplaćenih komunalnih računa;
- podsjeća da konkretno zaostatak u procesuiranju predmeta ratnih zločina i dalje predstavlja razlog za ozbiljnu zabrinutost. U tom smislu, podsjeća na zaključke usvojene na 3287. sastanku Vijeća za opće poslove, održanom u Briselu 17. decembra 2013, kojima se naglašava činjenica da je „pravilno postupanje u predmetima ratnih zločina ključno. Pravda se mora garantirati žrtvama i njihovim porodicama i moraju se podržati naponi u pravcu pomirenja društva u Bosni i Hercegovini, kao i u cijeloj regiji. Sve osobe osumnjčene za ratne zločine moraju biti izvedene pred lice pravde“.
- snažno podsjeća da je efikasno i blagovremeno procesuiranje predmeta ratnih zločina, uključujući predmete seksualnog i rodnog nasilja, ključno za pomirenje.

Po pitanju provedbe Državne strategije za rad na predmetima ratnih zločina, Evropska

komisija:

- ponavlja da, u kontekstu strategije, najsloženije predmete kao i predmete iz takozvane Kategorije II koje je MKSJ prenio na Tužilaštvo BiH treba rješavati bez odlaganja. Tužilaštvo BiH treba da redovno dostavlja detaljne periodične izvještaje o rješavanju ovih predmeta;
- nadalje podsjeća na važnost uloge Nadzornog tijela za provođenje Državne strategije za rad na predmetima ratnih zločina, kada je u pitanju praćenje ostvarivanja ciljeva iz pojedinačnih akcionih planova svakog tužilaštva u BiH za rješavanje predmeta ratnih zločina, kao i predmeta koje obrađuju nadležni sudovi;
- napominje da je obaveza tužilaštava u cijeloj BiH, kao i sudova, da utvrde prioritete kada su u pitanju predmeti ratnih zločina koji su već preneseni, tako da se proces prenošenja može nastaviti u cilju smanjenja zaostatka u rješavanju predmeta pred pravosudnim organima u cijeloj BiH;
- očekuje da efikasno i rigorozno upravljanje prenesenim predmetima ratnih zločina doprinese utvrđivanju konačnog i tačnog broj predmeta na svakom nivou vlasti kako bi se procijenili kapaciteti nadležnih organa za ostvarenje strateških ciljeva. Poziva Nadzorno tijelo da objedini ove brojeve i dostavi pregled procesuiranja predmeta ratnih zločina do predviđenog roka, kao što je navedeno u Strategiji.

Po pitanju strateškog okvira za borbu protiv korupcije, Evropska komisija:

- ističe da treba zadržati i ojačati sveobuhvatan pristup u pripremi nove strategije za borbu protiv korupcije za period 2015-2019;
- u tom kontekstu, u saradnji sa Agencijom za sprečavanje korupcije i koordinaciju borbe protiv korupcije (u daljnjem tekstu: Agencija) poziva Vijeće ministara da osnuje prikladno reprezentativnu radnu grupu na nivou BiH, sačinjenu od članova iz različitih oblasti i nadležnosti, sa ciljem sastavljanja i usvajanja realne nove strategije za borbu protiv korupcije na nivou BiH za period 2015-2019. usmjerene ka rezultatima, uz odgovarajući akcioni plan;
- naglašava da utvrđivanje prioriteta za novu strategiju treba biti zasnovano na sveobuhvatnoj kvalitativnoj analizi provedbe postojeće strategije, temeljitoj procjeni rizika od korupcije kao i na dostupnom sektorskim istraživanju. U tom smislu dijeli zabrinutost koju su izrazili predstavnici organizacija civilnog društva, a na koju je ukazano tokom plenarne rasprave u okviru Strukturiranog dijaloga;

- podsjeća da se treba osigurati dosljednost mjera osmišljenih u sklopu strategija na svim nivoima vlasti, uzimajući u obzir raspodjelu odgovornosti između države i ostalih nivoa;
- poziva sve nadležne organe da obezbijede potrebna sredstva za provedbu svojih strategija i akcionih planova, uključujući između ostalog i izdvajanje odgovarajućih budžetskih sredstava za usvojene mjere.

Po pitanju propisa o javnim nabavkama, Evropska komisija:

- naglašava da efikasna potrošnja javnih sredstava i smanjenje potencijala za prevare i korupciju i dalje predstavlja ključni izazov na kojem se moraju angažovati svi dostupni pravni instrumenti i strateška sredstva;
- prima k znanju da je Parlamentarna skupština BiH usvojila novi Zakon o javnim nabavkama, u sklopu napora na približavanju relevantnom *acquis*-u EU i evropskim standardima;
- ponovo ističe potrebu odgovarajuće provedbe ovih propisa i daljnjeg objedinjavanja rigoroznih i potpuno transparentnih postupaka javnih nabavki.

Po pitanju propisa o zaštiti osoba koje prijavljuju korupciju, Evropska komisija:

- podsjeća na stav usvojen u Izvještaju o napretku za 2013. godinu, kojim se naglašava da zakonski režim u BiH ne obezbjeđuje prikladnu zaštitu osobama koje prijavljuju korupciju, koja čini ključni aspekt aktivnosti u borbi protiv korupcije;
- smatra da je usvajanje relevantnih propisa na državnom nivou veoma pozitivno i da treba biti praćeno njihovom brзом provedbom, između ostalog po pitanju pojačanog izvještavanja o korupciji;
- ističe da se usvajanje adekvatnih i usklađenih mjera zaštite na entitetskom, kantonalnom i nivou Brčko Distrikta mora smatrati prioritetom. U tom smislu poziva nadležne organe da uzmu u obzir set preporuka o zaštiti ovih osoba, Preporuka CM/Rec(2014)7, koju je u Strazburu 30.04.2014. usvojio Odbor ministara Vijeća Evrope.

Po pitanju propisa kojim se uređuju sukob interesa i imovinski kartoni, Zakona o slobodi pristupa informacijama, finansiranju političkih stranaka i pranju novca, Evropska komisija:

- naglašava da zakonski okvir kojim se uređuju pitanja sprečavanja korupcije mora biti u

potpunosti usklađen sa odgovarajućim međunarodnim standardima (npr. GRECO, MONEYVAL, FATF, OSCE/ODIHR, UNCAC itd.), kao preduslov za odvratanje od korupcije i uspostavljanje djelotvornih i održivih kontrolnih mehanizama;

- naglašava potrebu za praćenjem i podnošenjem redovnih izvještaja nadležnim organima i javnosti o nivou usklađenosti sa navedenim standardima, sa ciljem stalnog uvida u adekvatne propise;
- izražava zabrinutost da se, u mnogim slučajevima, čini da su zakonodavni organi napore na dostizanju viših standarda borbe protiv korupcije, naročito u osjetljivoj oblasti sukoba interesa, preusmjerili u suprotnom smjeru;
- poziva nadležne organe da, u saradnji sa Agencijom, pripremaju adekvatne strateške mjere za buduću strategiju borbe protiv korupcije i akcioni plan, kojim će se rješavati svi utvrđeni nedostaci;
- naročito poziva nadležne organe na svim nivoima da ispoštuju preporuke GRECO-a u oblasti finansiranja političkih stranaka, izdane u novembru 2013. godine;
- poziva vlasti u Federaciji BiH i Brčko Distriktu BiH da upotpune zakonodavni okvir u oblasti sukoba interesa, nakon prenošenja nadležnosti za predmete sukoba interesa sa Centralne izborne komisije BiH na Parlamentarnu skupštinu BiH;
- podvlači važnost sistematskog i proaktivnog korištenja imovinskih kartona, kako posebnog pomagala u borbi protiv korupcije. Naročito se stalno treba provjeravati tačnost imovinskih kartona i popunjavati postojeći pravni vakuum;
- u tom pogledu pozdravlja inicijativu vlasti u Republici Srpskoj da u provedbu novog akcionog plana za borbu protiv korupcije uključi veliki broj subjekata u nevladinom sektoru, te poziva na osiguravanje trajne predanosti uz daljnje uključivanje organizacija civilnog sektora u tom smislu.

Po pitanju revizije Zakona o zabrani diskriminacije, jačanja preventivnih mjera i daljnjeg prikupljanja i razmjene relevantnih informacija i statističkih podataka, Evropska komisija:

- pozdravlja inicijativu Ministarstva za ljudska prava i izbjeglice (MLJPI) da se osnuje neformalna radna grupa sa zadatkom da izradi prijedlog procesnih izmjena i dopuna Zakona o zabrani diskriminacije iz 2009. godine;
- dodatno naglašava da su potrebne procesne izmjene i dopune kako bi se osiguralo da sudije

koje postupaju po predmetima diskriminacije u cijeloj državi primjenjuju i tumače ovaj zakon na usklađen način, te kako bi se u krajnjoj mjeri poboljšala pravna sigurnost potencijalnih podnosilaca tužbi;

- očekuje od MLJPI da razmotri unošenje značajnijih izmjena i dopuna kako bi se ovaj zakon uskladio sa *acquis*-em EU, naročito u pogledu invalidnosti i starosti kao osnova za diskriminaciju, kao i unošenje definicije seksualne orijentacije i rodnog identiteta u skladu sa međunarodno dogovorenim terminologijom. Nadalje očekuje da se odredbe Zakona o zabrani diskriminacije na odgovarajući način odraze na radno pravo i zakone o visokom obrazovanju na državnom i entitetskom nivou;
- snažno ohrabruje MLJPI da vrši systemske i sveobuhvatne konsultacije sa organizacijama civilnog društva, uključujući i predstavnike pravne profesije, o nacrtu izmjena i dopuna Zakona o zabrani diskriminacije;
- s obzirom na mali broj presuda u predmetima diskriminacije i očito nedovoljnu informiranost sudija, tužilaca, pravnika i građana o postojećim pravnim lijekovima, podsjeća da bi se trebali poduzeti napori na podizanju svijesti kroz obavještanje javnosti, ciljane obuke za sudije, tužioce i pravnike, te postepeno uključivanje Zakona o zabrani diskriminacije u stručne ispite za državnu službu;
- poziva na uspostavu jedinstvenog sistema za prikupljanje i dijeljenje podataka o praksi diskriminacije, na svim nivoima vlasti nakon usvajanja pravilnika o prikupljanju podataka.
- poziva MLJPI da traži seminar na ekspertnom nivou, uz korištenje instrumenta TAIEX, o značajnim aspektima Zakona o zabrani diskriminacije i o prikupljanju podataka za potrebe sprečavanja diskriminacije.

Po pitanju saradnje policije i tužilaca na svim nadležnim nivoima, Evropska komisija:

- naglašava potrebu za koherentnim pristupom u unapređivanju efikasnosti rada i ocjenjivanju, uključujući unapređivanje zakonskog okvira i unaprijedene mehanizme saradnje između tužilaca i policijskih službenika;
- ističe važnost zajedničkih aktivnosti strateškog planiranja (tj. istraga koje vode tužioci i operacija zasnovanih na prioritetima);
- traži da se utvrde precizni podaci o broju optužnica koje su nadležni sudovi odbacili zbog nezakonito prikupljenih dokaza te zadužuje VSTV da koordinira pripremu ovog kvantitativnog pregleda, koja će se po potrebi dopuniti ciljanom kvalitativnom procjenom

ključnih neriješenih pitanja u policijsko/tužilačkoj saradnji;

- poziva na jačanje strateškog pristupa tužilačkom radu, tj. održavanje redovnijih sastanaka glavnih tužilaca radi definisanja npr. zajedničkih kriterija za pristupanje predmetima korupcije na visokom nivou ili složenim istragama protiv mreža organizovanog kriminala;
- naglašava potrebu za poboljšanjem sistema upravljanja predmetima u tužilaštvima, nadzora nad predmetima i struktura odgovornosti u tužilaštvima, naročito putem revizije pravilnika o unutrašnjoj organizaciji i poboljšanja prikupljanja kvalitativnih podataka;
- naglašava potrebu za unapređivanjem profesionalnog integriteta tužilaca i policijskih službenika, jasnim i transparentnim postupcima i mjerama odgovornosti, uključujući procjenu uloge i rada Ureda disciplinskog tužioca. Potrebno je ojačati usmjerenost sistema ocjenjivanja ka rezultatima;
- ponovo ističe da je razmjena informacija i dobrih praksi među svim relevantnim akterima veoma važno pitanje. Naglašava veliku važnost održavanja i razvoja Sistema za razmjenu podataka između policijskih i tužilačkih organa, kao i ostalih oblika unutardržavne i međunarodne saradnje (tj. dijeljenje obavještajnih podataka o kriminalu u svrhu planiranja zajedničkih aktivnosti, kanali EUROPOL-a i EUROJUST-a itd.). Takođe bi se trebalo uzeti u obzir stvaranje višedisciplinarnih timova po osnovu predmeta/krivičnih djela;
- podsjeća da se u procesu prenošenja istraga i predmeta između različitih nivoa vlasti moraju uzeti u obzir potrebe agencija za provedbu zakona, uključujući i pravo na odgovarajuće i pravovremene informacije, kao što je već naglašeno u zaključku sa plenarnog sastanka Strukturiranog dijaloga, održanog u Brčkom u aprilu 2013;
- naglašava neophodnost trajnog profesionalnog obučavanja, uključujući zajedničke programe za tužioce i policijske službenike sa naglaskom na odredbe o korupciji i organizovanom kriminalu, te podržava zahtjeve nosilaca pravosudnih funkcija za naprednim obukama na temu odredbi o zapljeni imovine i proširenoj konfiskaciji;
- pozdravlja napore na nivou Federacije BiH na rješavanju pitanja konfiskacije i upravljanja imovinom konfiskovanom tokom krivičnog postupka kroz propise izrađene u novije vrijeme, uzimajući u obzir relevantne međunarodne i evropske standarde;
- poziva Ministarstvo pravde BiH da radi na iznalaženju rješenja tako da na državnom nivou u BiH postoji struktura odgovorna za konfiskaciju i upravljanje imovinom konfiskovanom tokom krivičnog postupka pred Sudom BiH.

Po pitanju mjera koje se odnose na integritet i profesionalnu odgovornost policijskih snaga, Evropska komisija:

- ponovo ističe potrebu za visokim nivoom integriteta policije, uključujući postupak zapošljavanja i unapređenja zasnovan na zaslugama;
- naglašava potrebu za djelotvornim unutrašnjim mehanizmima za suzbijanje korupcije u policiji i povećanje odgovornosti (kao što je usvajanje etičkog koda i usvajanje i stvarna provedba planova integriteta);
- ističe da se odgovornost policije može poboljšati između ostalog i putem revizije propisa kojima se uređuje rad nadzornih institucija (kao što su nezavisni odbori, javni uredi za žalbe i službe za profesionalne standarde).

Po pitanju mjera koje se odnose na efikasnost i koordinaciju policijskih snaga u postojećem zakonskom okviru, Evropska komisija:

- podsjeća da je djelotvorna i pojačana saradnja među svim nadležnim tijelima za provedbu zakona u sektoru javne sigurnosti neophodni preduslov za jačanje vladavine prava, te stoga svaki nivo vlasti treba da djeluje na najtransparentniji i najobjektivniji način, u skladu sa svojim nadležnostima definisanim zakonom;
- naglašava da je potpuno funkcionalan sektor sigurnosti, bez obzira na njegovu rascjepkanu strukturu, ključni element za razvoj i jačanje vladavine prava, koja je od temeljnog značaja za proces evropskih integracija;
- konkretno, ističe potrebu da nadležna policijska tijela izrade i sprovode zajedničke strateške ciljeve u skladu sa svojim nadležnostima, u oblastima kao što je forenzika, suzbijanje upotrebe droga, nezakonitog trgovanja oružjem i druga pitanja od opšteg interesa (kao što su zapljene imovine, propisi o zaštiti ličnih podataka u policiji u skladu sa zakonodavstvom EU), u kojima se primjena holističkog pristupa i konsolidovanih mehanizama koordinacije može pokazati korisnom;
- naglašava potrebu za većom efikasnošću razmjene podataka, između ostalog putem jedinstvene kontaktne tačke radi efikasne međunarodne policijske saradnje.

Po pitanju aktivnosti nakon plenarnog sastanka Strukturiranog dijaloga, Evropska komisija:

- podsjeća da svi prethodni paketi preporuka, koje treba sprovesti, ostaju na snazi i da na njima, bez daljeg odlaganja, treba propisno raditi.